

孝

傳

陶潛著

中華書局

孝傳目錄

天子

諸侯

卿大夫

士

庶人

孝傳目錄

孝傳

晉 陶潛著

天子 虞舜 夏禹 殷高宗 周文王

虞舜父頑母瞽。事之於畝畝之間。以孝蒸蒸。是以堯聞而授之。富有天下。貴爲天子。以爲不順於父母。若窮而無歸。惟順親可以得意。苟違朝夕。若嬰兒之思戀。故稱舜五十而慕。書曰。憂擊鳴球。搏拊琴瑟以詠。祖考來格。言思其來而訓一作之。愛敬盡於事親。是以德教加於百姓。刑於四海。夏禹有天下。以奉宗廟。然躬自菲薄。以厚其孝。孔子曰。禹吾無間然矣。非飲食而致孝乎鬼神。惡衣服而致美乎黻冕。禹之德於是稱聞。聖人之德。無以加於孝敬。孝敬之道。美莫大焉。殷高宗諒陰。三年不言。百官總己而聽於冢宰。三年而後言。天下咸歎。德教大行。殷道以興。詩曰。一人有慶。兆民賴之。其此之謂乎。周文王之爲世子也。朝於王季。日三雞鳴。至於寢門。問於內豎。內豎曰。安。文王乃喜。不安則色憂。行不能正履。日中暮亦如之。食上必視寒溫之節。食下必問所膳而後退。文王孝道光。大其化自近至遠。刑于寡妻。以御于家邦。故得萬國之歡心。以事其先王矣。

贊曰。至哉后德。聖敬自天。陶漁致養。菲薄享先。親疾色憂。諒陰寢言。一人有慶。千載賴旃。

諸侯 周公旦 魯季公 河間獻王

周公旦。武王之弟。成王幼少。周公攝政。制禮作樂。郊祀后稷。以配天。宗祀文王於明堂。以配上帝。是以四

海之內各以其職來祭。詩曰：於穆清廟，肅雍顯相。言諸侯樂其位而敬其事也。仲尼曰：孝莫大於嚴父，嚴父莫大於配天，則周公其人也。貴而不驕，位高彌謙。自承文武之休烈，孝道通于神明，光被四海，武王封之於魯，備其禮樂，以奉宗廟焉。魯孝公之爲公子，周宣王問公子能道訓諸侯者立之，樊穆仲稱其孝曰：肅恭明神而敬事耆老，賦事行刑，必問於遺訓，咨於故寔，不干所問，不犯所咨。王曰：然則能訓理其民矣，乃命之於夷宮，是爲孝公。夫宗廟致敬，不忘親也，有國不亦宜乎？漢河間惠王獻王之曾孫也，西京藩臣多驕放之失，其明德者唯獻王，而惠王繼之。漢書稱其能脩獻王之行，母薨，服喪盡禮，哀帝下詔書褒揚，以爲宗室儀表，增封萬戶。禮古之人皆然，至於末俗衰薄，固已賢矣。貴而率禮又難，其見褒賞不亦宜乎？贊曰：貴驕殊途，不期而會。周公勞謙，乃成光大。二侯承魯，遵儉去泰。河間率禮，漢宗是賴。

卿大夫 孔子 孟莊子 穎考叔

孔子，魯人也。入則事父兄，出則事公卿，喪事不敢不勉，故稱曰：孝乎惟孝，友于兄弟，是亦爲政也。君賜腥，必熟而薦之；雖蔬食而齊祭，如在。鄉人儺，朝服立於阼階，孝之至也。至德要道，莫大於孝，是以曾參受而書之。游夏之徒，常咨稟焉，許止不嘗藥，書以殺父，宰我暫言滅喪，責以不仁，言合訓典，行合士範，德義可尊，作事可法，遺文不朽，揚名千載。孟莊子，魯人也。孔子稱其孝，其他可能也。其不改父之政，與父之臣，是難能也。夫孝子之事親也，事亡如事存，故當不義則爭之存，所不爭則亡，亦不敢改父之道，猶謂之孝。況終身乎？穎考叔，鄭人也。莊公以叔段之故，與母誓曰：不及黃泉，無相見也。旣而悔之，考叔爲封人，聞之，有

獻於公。公賜之食。而舍肉。公問之。對曰。小人有母。未嘗君之羹。請以遺之。公曰。汝有母遺。緊我獨無。考叔曰。何謂也。公語之故。且告之悔。考叔曰。若掘地見泉。隧而相見。其誰曰不然。公從之。遂爲母子如初。君子曰。穎考叔純孝也。愛其母而施及莊公。詩云。孝子不匱。永錫爾類。其是之謂乎。

士 高柴 樂正子春 孔奮 黃香

高柴。衛人也。喪親泣血。三年未嘗見齒。所謂哭不偯。言不文也。爲武城宰而化行。民有不服其親者。改之行喪如禮。君子之德風也。以身先之。而民不遺其親。樂正子春。魯人也。下堂傷足。旣瘳。數月不出。猶有憂色。曰。吾聞之。曾子。父母全而生之。己全而歸之。可謂孝矣。故君子一舉足。一出言。不敢忘父母。不敢毀傷。孝之始也。夫能敬慎若斯。而災患及者。未之有也。孔奮。扶風人也。少以孝行著名州里。供養至謹。在官唯母極甘美。妻息菜食。歷位以清。夫人情莫不欲厚其親。然亦有分焉。奮則難繼。飽致儉。以全養者鮮矣。黃香。江夏人也。九歲失母。思慕骨立。事父竭力。以致養。冬無被褥。而盡滋味。暑則扇床枕。寒則以身溫席。漢和帝嘉之。特加異賜。歷位恭勤。寵祿榮親。可謂夙興夜寐。無忝爾所生者也。

贊曰。顯允羣士。行如名鈞。咸能夙夜。以義榮親。率彼城邑。用化厥民。忠以悟主。其孝乃純。

庶人 江革 歷範 汝郁 殷陶

江革。齊人也。漢章帝時。避賊負母而逃。賊賢之不害。而告其生路。竭力備償。以致甘暖。和顏悅色。以盡歡

心欲親之安。自挽車以行。鄉人歸之。號曰江巨孝位。至五官中郎將。天子嘉焉。寵遇甚厚。告歸。詔書褒美。就家禮其終身。以顯異行。廉範。京兆人也。少孤。十五入蜀迎父喪。過石船覆。範執骸一作抱棺而沒。船人救之。僅免於死。遂以喪歸。及仕郡。拯太守於危難。送故盡節。章帝時爲郡守。百姓歌詠之。夫孝者。人之本。教之所由生也。是以範之臨危也。勇。幸民也。惠。能以義顯也。汝郁。陳郡人也。五歲母病。不食。郁亦不食。母憐之。強食。郁能察色知病。輒復不食。族人號曰異童。年十五。著於鄉里。父母終。思慕致委。推財與兄弟。隱於草澤。君子以爲難。況童齡孝於自然。可謂天性也。殷陶。汝南人也。年十二。以孝稱。遭父憂。率情合禮。有長蛇帶其門。舉家奔走。陶以喪柩在焉。獨居廬不動。親戚扶持曉諭。莫能移之。啼號益盛。由是顯名。屢辭辟命。夫智者不惑。勇者不懼。陶孝於其親。而智勇並彰乎弱齡。斯又難矣。

贊曰。事親盡歡。其難在色。彼養以祿。我養以力。義在一作存。愛敬。榮不假飾。嗟爾衆庶。鑒茲前式。右陶潛孝傳一卷。北齊陽休之本。作五孝傳。蓋依孝經中天子諸侯卿大夫士庶人章次。分爲五篇。故謂之五孝傳。晁氏云。靖節先生集有數本。梁蕭統編以序傳顏延之誄。載卷首爲七卷。其十卷則休之益以五孝傳。聖賢羣輔錄并序傳誄釐爲三卷也。隋唐以來。二書俱附入陶集。故不另列。二志書目。予又竊怪二志所收王韶之蕭廣濟鄭緝之師覺授宋躬虞槃徐廣周景式諸家孝子傳。俱不傳。而五孝傳寥寥數篇。以附本集。獨存。何氏因之。摭入叢書。書之存亡。烏論卷帙多寡乎哉。汝上王謨識。